



U dvije akcije SIPA uhapšeno više od 20 osoba

Tekstilna kriminalna organizacija koja je djelovala u cijeloj državi, budžet je oštetila za više od 4,5 miliona maraka, a danas će uslijediti odluka o pritvoru uhapšenih

MIREN ALJIĆ

Tužilaštvo BiH je nakon ispitivanja uhapšenih u jučerašnjoj akciji Truck od državnog Suda zatražilo određivanje pritvora za pet osoba. Akcija Truck provedena je po nalogu Tužilaštva BiH i usmjerena je na otkrivanje i procesuiranje osoba osumnjičenih za porezne utaje i pranje novca u oba entiteta. Mjera pritvora je predložena zbog opasnosti od bjekstva, ali i zbog opasnosti da bi boravkom naslobodi osumnjičeni mogli ometati istragu, prikrivati dokaze i vršiti utjecaj na svjedoke ili saučesnike.

Makedonsko državljanstvo

- Opasnost od bjekstva se posebno odnosi na osobe koje pored bosanskohercegovačkog imaju i makedonsko državljanstvo, kazao je Boris Grubešić, portparol Tužilaštva BiH.

Prema informacijama koje je SIPA objavila, osumnjičeni su nelegalno uvozili tekstil iz Turske, Mađarske i Italije, a sve je rađeno na području Banje Luke, Gradiške,

Sarajeva, Gradačca i Srebrenika. Ni SIPA ni Tužilaštvo BiH do kraja jučerašnjeg dana nisu saopštili identitete uhapšenih.

SIPA je jučer Tužilaštvu na dalje postupanje predala još 11 osumnjičenih koji su u paralelnoj akciji Master uhapšeni na području navedenih općina. Tokom akcije je zaplijenjeno više od 300 hiljada KM vrijednosti novca u različitim valutama, ali i oružje.

- Tokom akcije Master lišeno je slobode 21 lice, od kojih je 11 jučer predato Tužilaštvu BiH na dalje

nadležno postupanje, saopšteno je iz SIPA.

Prema još nepotvrđenim informacijama, u dvije akcije je pretreseno nekoliko desetina objekata, a privedeno je više od 20 osoba. Među njima je, navodno, glavni osumnjičeni Ferhat Peštalić, zvani Pero, iz Gradačca, koji je vlasnik firme Ekstrablat iz Gradačca i tereti ga se da je orga-

nizator kriminalne grupe. Peštalić je dugogodišnji saradnik Sedinet Karića Side iz Srebrenika, koji je već osuđivan za poreske i carinske utaje.

Spisak firmi

Osim Peštalića i njegovih objekata, pretreseni su i objekti sarajevske firme Eurooptimus, čiji je direktor i osnivač Edin Helać, kao i Knjigovodstveni biro Abacus, koji vodio knjige za firmu EurOptimus. Pod istragom su još bili i Hisar Trejd i Bosfor Trejd iz Brčkog, koje vode Nermin Jahić, odnosno Kemal Rabić, a pretresene su i prostorije Špeditorske kuće Namit u Gradišci, u kojoj je odgovorno lice Nada Štrbac.

Policija je pretresla i objekte u vlasništvu kontroverznog fudbalskog menadžera Admira Husarića i advokata Hajrudina Škahića u Srebreniku, te Nusreta Mustabašića u Gradačcu i Miloša Jakovljevića u Banjoj Luci.



SIPA je na dalje postupanje predala 11 uhapšenih

Blokirani su i tekući računi šest fizičkih i tri pravna lica, te je obustavljena transakcija više od 130.000 KM. Danas se očekuje da Tužilaštvo BiH zatraži pritvor za više osoba uhapšenih u akciji Master.